

皇

明

史

概

皇明大事記卷之十二

朱國禎輯

平西南諸蠻

甲辰 上卽吳王位視師武昌陳理出降 初友諒乘  
元亂以勇悍聚其黨橫行江湖間招引溪洞蠻爲助蠻  
之種類至多各有地界各有長官性貪甚但以寸膏尺  
帛招之無不應本寨不足乞之別寨報數名一千實二  
三千萬亦如之喜鬪輕生自辰靖而上達於川廣皆是  
種也友諒雖無遠畧然其氣力能驅使此輩破城陷陣  
恣所擄掠故其勢大熾由江州直下目無金陵且席捲

吳會矣既遇

眞主戰屢敗鄱陽之役蠻人見水勢洶

湧砲聲震裂率跳岸而逃友諒既死武昌不守 六月

湖廣安定等處宣撫使向思明等遣其溪洞長官硬徹

律等以元所授宣勅及印章來上請改授官命仍置安

定等處宣撫司設宣撫使二以思明及其弟思勝爲之

又置懷德軍民宣撫司設宣撫使一以向大旺什用爲

之統軍元帥二以南木什用潘仲玉爲之抽攔不夜黃

石三洞各置長官一以沒葉什用大疊什用硬徹律爲

之幹埒洞元帥府設元帥一以向顯祖爲之梅梓麻寮

三洞各置長官一以向志明唐漢明爲之置慈利軍民

宣撫司以其土官覃屋夏克武爲宣撫使田重祿周知  
司事時屋等歸順以故元所授叅政照會三道來乞改  
置官司 上從其請且俾因其俗而治九月漳州潮鄉  
土酋易華來降華自壬辰兵起集少壯據黃牛峯至是  
徐大將軍招之乃降未幾復叛討斬之十月慈利土官  
覃厚來降置司以爲宣撫使使田重祿爲同知厚尋貢  
馬二十四匹賞賚之乙巳六月思南宣慰使田仁智遣其  
都事楊琛歸欵 上曰仁智僻處遐荒世長溪澗乃能  
識天命率先來歸可嘉俾仍爲思南道宣慰使授琛思  
川等處軍民宣撫使兼新軍萬戶以三品銀印授之何

文輝平山尖塞擒盜萬宗等斬之七月思州宣撫使兼  
湖廣行省左丞田仁厚遣其都事林憲萬戶張思溫來  
獻鎮遠古州軍民二府夔川功水常寧等十縣龍泉瑞  
溪沿河等三十四州皆其所守地也於是命改宣撫司  
爲思南鎮西等處宣慰使司以仁厚爲宣慰使 容美  
洞宣撫使田光寶遣弟光受及宣慰同知彭建思等以  
元所授宣勅印章來 上命光寶爲四川行省叅政行  
容美洞等處軍民宣撫司事仍爲置安撫元帥治之彭  
世雄爲保靖軍民安撫使田升玉爲鎮南軍民宣慰使  
田光俊爲太平臺宜靖安等處安撫使墨色什用爲桑

直荒溪等處宣撫使田思勝爲守鎮邊境大屯等處軍  
民元帥府元帥楊玘典爲守鎮邊境等處元帥府元帥  
自餘副使萬戶千戶等凡數百人皆以其初來歸附故  
也 上諭各宜慰諭曰谿峒互相控制必得世守之臣  
乃能盡撫綏之道爾自前代以來祖父皆受爵命以官  
其土今能保境安民效順來附良可嘉也 又賜勅曰  
國家以武定四方有能嚮慕効順者必授以官爵爾以  
所保境土歸附其餘谿洞民庶悉能撫治其益同心宣  
力繼爾前人之志其後辰州蠻叛 上諭指揮楊仲名  
曰兵以恤民爲重伐暴當先三苗無道負險重山旣不

同於人事甚不奉於天時自古帝王多撫而不能遵化  
以致累世爲良民害今命爾相機進取以消民艱爾其  
深制人之韜以稱朕意

吳元年七月命左相國徐達按視湖湘 上諭曰武昌  
旣平湖南郡邑相繼款附然其間多陳氏部曲觀望自  
疑亦有山寨遺孽馮恃險阻爾當撫綏招徠俾安生業  
于是所至望風迎降以楊璟爲湖廣叅政諭曰湖南谿  
洞恃險負固叛服不常宜多方以取之薄其山寨絕其  
樵採結聚之徒旣無所得勢必潰散乘機勦捕脅從開  
釋收復鎮撫以綏遠人璟率師由松滋至澧陽等處招

撫駐師三江口覃垕等詣軍門謁見思沅兩界軍民安撫使黃元明以其地內附指揮王遇成進攻石臘茶茅諸寨悉破之于是土酋劉陽黃寧茶鄉譚悅道湘陰吳仁琮劉玉等皆納款別將張秉彝招雷州諸酋皆降日番間餘寇竊發率千戶王清擒斬七十餘人乃定

洪武元年戊申廣東旣平都指揮同知耿天璧取南安儋萬等州與生黎化黎小陽洞主汪官泰等戰敗之皆出降編籍定賦七月廣西左江太平府土官黃英衍右江田州府土官岑伯顏等遣使貢印章詣平章楊璟降九月湖廣保靖安撫司安撫彭萬里遣子德勝奉表獻



馬及方物詔改爲保靖宣慰司以萬里爲宣慰使十且  
改瓊州乾寧安撫司爲瓊州府南建州爲定安縣十一  
月丙午遣中書照磨蕭以權齎詔往諭廣西左右兩江  
溪洞官民以權至廣西衛鎮撫彭宗萬戶劉惟善以兵  
護送將抵兩江會來賓洞人潘宗富寇掠楊家寨卽督  
宗等擊破之安輯其地兩江由是懾服

二年正月湖廣行省言慶遠府地接八番溪洞所轄南  
州宜山等處宋元皆用其夷酋爲安撫使以統之入兵  
下廣西安撫使莫天護首來款附宜如宋元制錄用以  
統其民則蠻情易服守兵可減 上從之詔改慶遠府

爲慶遠南丹軍民安撫司置安撫使同知副使經歷知  
事各一員以天護爲同知通判王毅爲副使六月思州  
土官曰弘正遣萬戶張思溫貢馬及方物弘正仁厚于  
也是時仁厚卒弘正來告哀且請襲職詔俟其服闋授  
之賜綺帛鈔錠慈利人唐勇集兵據麻寮寨卽其地置  
千戶授勇官守之七月右江田州府土官岑伯顏與安  
府岑漢忠向武州黃世鐵左江太平府黃英衍思明府  
黃忽都龍州趙帖堅各遣使奉表貢馬及方物詔以伯  
顏爲田州府知府漢忠爲來安府知府世鐵爲向武州  
知州英衍爲太平府知府忽都爲思明府知府帖堅爲

龍州知州兼萬戶皆許世襲中書省奏廣西諸洞雖平  
宜遷其人內地可無邊患 上曰溪洞猺僚雜處其人  
不知禮義順之則服逆之則變未可輕動其機全在守  
令今且以兵分守要害鎮服之俾日漸教化數年之後  
皆爲良民何必遷也十二月辰州永順宣撫彭添保遣  
其從兄敬保來朝貢馬及方物詔以永順宣撫司爲永  
順軍民安撫司添保爲同知總兵官兩廣旣平丘廣等  
兵至上思州蠻寇黃英傑拒戰廣擊敗之擒從賊黃權  
等英傑走十萬山復以兵追及斬之上思州平湖廣慈  
利縣上酋叛糾十戶覃友仁命左丞周德興平章曹良

臣李伯昇將兵討平之

三年庚戌正月遣使以文綺上尊賜來安府知府岑漢忠及其弟漢良其子振先是漢忠漢良自入雲南招諭定遠諸群縣十有六處漢良因以兵守其土上嘉勞之仍詔漢忠以兵招諭未附之地辰州諸洞長官楊秀榮等來朝各賜冠服仍舊職立衛轄之三月廣西行相言便宜三事一曰廣西地接交趾雲南其所治皆溪洞苗蠻性狠戾而叛服不常近南寧盜談布政賓州盜舊即官等肆掠已遣兵討之然府衛之兵遠在靖江數百里外卒有警急難相爲援乞於南寧柳州立衛置兵以

鎮之庶苗獠有所憚而不敢竊發民得安生而無奔竄  
失業之患二曰慶遠故府也今爲南冊軍民安撫司雖  
統地十有七州然皆深山廣野其民多安撫同知莫天  
護之族天護素庸弱不能禦衆而宗族强者動肆跋扈  
至於殺河池縣丞蓋護與諸蠻相扇爲亂此豈可姑息  
以貽禍將來乞罷安撫司復設慶遠府置軍衛以守庶  
其民知官府之尊而不敢自恣諸蠻知兵重而不敢爲  
亂此又安之道也三曰廣海之俗素獷悍動相讐殺因  
而爲亂一方皆警其始蓋緣郡縣無兵以制馭之故也  
近羣盜轉攻鬱林州同知王彬集民兵拒之潯州經歷

徐承祖亦以民兵千餘敗賊由此言之土兵未必不可用也乞廣西邊境郡縣長官輯民丁之壯者置衣甲器械籍之有司無事務農有事率之捕盜如此郡縣無養兵之費而民實賴之以安也詔俱從之遂設南寧柳州二衛益兵守禦改慶遠安撫司爲慶遠府命莫天護赴京賞同知王彬經歷徐承祖以下破賊有功者又置靖州衛命指揮同知劉才僉事孫維劉福等築城戍守統湖耳等處土官四月覃厚構諸洞蠻爲亂命湖廣行省平章楊璟以兵討之諭以驅逐不必窮追兵至賊衆下山迎敵擊敗之乘勝追至牛山山勢陡峻視其寨三面

巖險而下俯江水一面僅有路纔通一人官軍不敢上  
乃回駐山下賊亦阻險自守未幾以三千人下山挑戰  
又擊敗之賊復遁入山璟遂以兵逼之屋乃遣人詐降  
璟不悟使部下黃永謙往報爲屋所執由是盡知吾軍  
虛實拒守不下璟欲爲持久計使人來請軍餉上讓  
之曰爾違吾言妄動而不能平賊旣已失矣又中其詭  
計以陷部將爾之智畧何在今再命叅政戴德以兵從  
凡諸小寨限以月日平之仍撫綏人民俾安生理毋致  
驚疑若再違朕命并以潞州失利之罪治爾勅至璟乃  
督將士盡力攻之賊遁入溪洞官軍乃還七月以殿中

侍御史尋适爲廣西按察司使監察御史王子啓胡哥  
祺爲僉事 上諭之曰廣西地控諸蠻民未熟化况兵  
戈凋瘵之餘未遂生業恐有司不能撫卹又從而竄害  
之茲特命爾等往司風憲須嚴明以馭吏寬裕以待民  
如有奸貪強暴虐良善者爾等就逮其人鞠問審決然  
後以聞若俟聞而後決道理遼遠往復不無淹滯又曰  
凡爲治無責近效若官守職民安業爾等但安靜以撫  
之十月覃虛復出爲寇命江夏侯周德興討之并茅岡  
諸洞皆破

五年壬子正月播州宣慰使楊鏗率其屬來朝賜綺帛



衣服置司仍舊職貴州宜慰使鄭彥文及土官宜慰使  
滿翠等來朝賜文綺製衣皆仍舊職又置貢竹等十一  
長官司普定府女總管適爾及其弟阿璫等來朝賜羅  
衣及文綺以適爾爲知府并各番土官龍世昌等朝貢  
皆如之 上以古州田州澧州等處洞蠻常梗化作亂  
命衛國公鄧愈爲征南將軍江夏侯周德興江陰侯吳  
良爲副將兵討之愈率營陽侯楊璟宜春侯黃彬出澧  
州德興率南雄侯趙庸指揮僉事左君弼出南寧良率  
平章李伯昇出靖州三道並進宜寧進忠宣撫使田惟  
戴來朝賜襲衣文綺惟戴尋病卒勅有司具殮還其柩

以子茂長襲職二月潮州故盜較何其入朝其舊部曲  
分散者各走險與山猺海寇相結聚據揭陽潮陽二縣  
指揮僉事王友等兵討之斬僞元帥三人獲賊一千一  
百六十餘人餘黨悉定又有掠陽江者亦捕滅之左若  
弼在南寧覆民之無籍者爲軍又縱所部軍士入山伐  
木猺多驚擾遂相構爲盜官軍討平之斬百餘級擒二  
千八百餘人命大都督府按罪君弼而禁戢其卒四月  
鄧愈兵至澧州遣楊璟等討散毛柿溪赤溪安福等三  
十九洞平之七月己卯貴州宣慰使霽翠上言部落有  
隴居者連結犵狁負險阻兵以拒官府乞討除之上

以隴居反側不從命由於霽翠所激謂都督府臣曰蠻夷多詐不足信也中國之兵豈外夷報怨之具安遣使諭蠻中守將慎守邊境霽翠所請不從將啓邊釁宜豫防之吳良等平五開潭溪古州諸蠻凡二百二十三洞籍其民一萬五千收集逃散士卒四千五百四十人九月周德興等討婪鳳安田等州諸洞蠻悉平之遂克泗城州化州石龍縣餘寇結連黃泥山等砦徭蠻作亂焚掠陸川北流二縣廣西衛兵討平之

六年癸丑正月四川筠連州滕大寨蠻酋編張等叛詐稱雲南兵據湖南長寧諸州縣命指揮袁洪討之洪引

兵至叙州慶符縣攻破清平等關擒僞千戶李文質百  
戶李布編張遁走復以兵犯江安諸縣洪追及之又敗  
其衆焚其九寨獲編張男僞鎮撫壽僞千戶徐官上  
聞諭洪曰南中蠻夷乍降乍叛乃其常事不足深罪今  
復其俘宜悉編爲軍如再不服然後誅之所叛之境必  
以威震否則終無懼心逃竄者駐兵索之毋遺民患  
番人寇隆德縣陸涼衛指揮莊德等討捕擒殺七十餘  
人編張復聚衆據舊寨洪再討之遁去洪追至小芒  
部不及遂取得花寨降蠻酋阿管等自是編張不敢復  
出其寨悉平廣東奏近儋州山賊作亂已調兵勦捕

復海船十八艘殺賊二千二百七十餘人生擒五百二十  
十四人其僑舊二州山深地曠宜設兵衛鎮之詔置僑  
萬二處守禦千戶所 田州總管黃志威招撫奉議等  
州一百一十七處人戶皆來款 上嘉志威之功命以  
安州侯川陽縣屬之十一月給田州牛種仍蠲稅二年  
四川龍渠洞宣撫使墨吾什遣子墨備可宜來朝納元  
所授印誥因陞龍渠洞千崖太平三安撫司并宣化州  
俱秩正三品思南永順保靖皆如之立四川龍州以土  
官薛文勝爲知州置四川天全六番招討司前土官高  
爲正招討王藏玉爲副招討定四川之雲陽榮山萬

三州爲縣又開設各州縣分治巴縣蠻王立保作亂稱  
應天大將軍燒佛圖開犯通遠南絕二門千戶左靖擊  
走之立重慶衛守以指揮阮鼎

七年甲寅正月柳州道村寨蠻寇韋布等以妖術亂指  
揮僉事周誼討平之擒布及從賊黃寬等百八十人斬  
布餘謫戍二月貴州衛指揮僉事張岱率兵攻谷峽刺  
向關擊蠻寇的令等走之追至的拔寨大破其衆三月  
中書省奏播州宣慰司土地旣入版圖宜收其賦稅諭  
令從輕四月永道桂陽諸州蠻寇竄發命金吾衛指揮  
同知陸齡率兵討平之四川茂州諸土官來朝 播州

江度蠻王安等作亂討平之

八年乙卯正月陞四川永寧長官司酋陽宣慰使皆爲宣撫司置平茶邑梅麻陽石耶洞四長官司皆用土酋爲之貴州衛指揮同知吳汝討蠻寇播桶等四十餘寨悉平之貴州江力江松刺向等寨復與播桶等連結苗獠二千餘人作亂圍定水堡殺戍兵平越安撫司乞兵救援卽命胡汝率兵討平之

九年丙辰 上以西南夷土官世居荒服未嘗躬朝闕下令率所部酋長入覲于是思南宣慰田仁智思州宣慰田弘正播州宣慰楊鑑等皆來朝賜資嘉獎勉以敬

上愛下仁智歸至九江卒遣官致祭還其柩左江太平  
府龍州上官趙帖堅言本州地隣交趾所守關隘二十  
七處設有警急須申報太平達于總司比報下已涉旬  
月恐誤事機乞依奉議泗城二州隸廣西爲便從之雲  
南人苟德祖仕元世襲邛州六蕃招討使明氏據蜀德  
兄安復爲黎州招討使明氏亡夷民潰散德奉母還居  
邛州至是四川守臣招之德遂來朝貢馬且請置官司  
詔以德爲黎州長官賜印及衣服綺帛播州宣慰楊鏗  
率其屬張坤趙簡來朝貢馬賜賚甚厚上諭曰爾先  
人世篤忠貞故使子孫代有爵土然繼世非難保業爲



難志不可驕欲不可縱志驕則失衆欲縱則滅身爾能  
益勵忠勤永堅臣節則可保世祿于永久也貴州新添  
蠻仇佬融縣人潘宥作亂皆擊斬之命各谿洞蠻人出  
沒處各擇要地立巡簡司仍諭以譏察非常不得生事  
啟蒙皆屬有司節制

十一年丁巳十一月四川威州等處土酋董貼里叛命御  
史大夫丁玉爲平羌將軍討之十二月兵至皆來降詔  
置威州千戶所守之

十一年戊午正月立黃平千戶所初立安撫司旣而蠻  
人屢劫略宣撫司不能治改置千戶所調貴州千戶張

潮領兵守之二月置茂州衛指揮使司時四川都司遣兵修灌縣橋梁至天陶關汶川縣土酋孟道貴疑之集部落阻陶關道都司遣指揮胡淵童勝等統兵分二道擊之一由石泉一由灌口由灌口者進次陶關蠻酋伏山間投亂石從兩崖下兵不能進適汶川土官來降得其間道乃選勇士捲旗甲乘夜潛入兩山後遲明從山頂張旗幟發火炮蠻人駭走我師進至鴈門關道險酋復據之乃駐平野得漁舟渡兵至龍山鐵野寨擊破之其山石泉進者次泥池蠻酋悉衆拒戰千戶薛文突陣射却之士奮擊大敗其衆兩軍遂會於茂州土酋楊

者七迎降以者七牧其民乃詔立茂州衛畱指揮楚華  
將兵三千守之淵等仍會丁玉征松潘等處三月四川  
茶蠻洞獠不供賦稅拒命重慶衛調兵征之俘其衆一  
百五十六人詔悉宥之置莊浪分衛於展北命指揮僉  
事李景守之四月命思南宣慰收集各洞打手二千人  
征用五月下沙木洞土酋以其衆叛湖廣都司發軍  
擒酋并其黨六十二人械至京師誅其首餘釋  
之戍邊六月五開洞蠻吳面兒等作亂指揮僉事過興  
死之初面兒以邪法惑人因聚衆爲亂興以兵三百往  
捕衆寡不敵父子爲賊所執俱被害上命辰州衛指揮

楊仲名率師討破之。面兒遁去。諭曰：三苗不仁，自當夷滅，不必窮追。置黔江千戶所於彭水縣，知縣輯原濟言黔江地接散毛盤順酋陽諸洞蠻寇，出沒屢爲民患，宜設兵衛屯守。詔從之。十一月，番族屢入犯西平侯沐英爲征西將軍，率都督僉事藍玉、王弼將京衛及河南陝西山西馬步官軍征之。

十二年己未，肩縣賊彭普貴誘衆作亂，轉攻州縣。知縣顧師勝率民兵捕之，爲賊所殺。上賜詔褒卹，仍勅四川都司音亮等勦捕，如力不支，須煩大軍遣使來言，毋失事機。尋切責亮等老師失機，命李文忠分一軍由

棧道撲滅普貴焚掠十四州縣丁玉進兵盡殲之陝西  
四川都司番酋洞條一百二十六人釋其罪發戍海南  
皆給糧贍之

十三年庚申正月廣西泗城州土官岑嘉忠之子振作  
亂討降之廣東右衛百戶翁顯討山寇房文廣戰于矮  
嶺死之文廣之衆爲衛兵所殲南雄侯趙庸鎮廣東剿  
陽春諸盜七月丙辰遣還廣西兩江思明等府民入京  
聽差遣者 上謂禮部曰溪洞民遠居京師去土懷鄉  
多生疾或致死亡非柔遠人也其各遣還鄉里給鈔爲  
道里費九月大征雲南勅播州宣慰楊鑑曰爾世守播

州作朕藩屏然輕聽浮言易生疑貳故積愆日深今大  
軍南征多用戰騎爾當以馬三千率酋兵二萬爲先鋒  
以表爾誠又勅金竺長官定密回西南諸夷雖曰歸附  
然不過暫人貢而已爾首獻馬五百疋以助征討其誠  
可嘉故特遣使者往諭候班師之日重勞爾功 福安  
縣民作亂指揮僉事李會等討之賊衆八千餘人拒敵  
指揮張春以兵來會賊懼遁入山谷適延安侯唐勝宗  
總兵征處州平陽等處聞之分遣將士追捕獲賊二千  
五百餘黨分散潛匿惠等尋討平之

十四年辛酉正月置松潘等處安撫司以龍州知州薛

文勝爲安撫使又置阿昔洞等十三族長官司及副長官五月五溪洞作亂議出師討之江夏侯周德興請行時德興年老上未之許德興請益力且示其嬰鏢狀上壯而遣之賜以手書曰古之將臣忠於爲國者盡智慮筋力之所能及禦災捍患終其身而後止若趙充國圖取西羌馬援請討交趾朕常歎美謂古有其人而今不可得乃者五溪蠻叛阻遏王化貽禍良民朕方擇將命師爾德興奮然請行朕憫卿年老不忍煩卿卿乃固請爰命爲大將往靖南服嗚呼忠勤不息卿之志見矣禦侮安民尤在斯行功成師旋當有以報卿也靖州蠻

作亂衛兵討平之八月南雄侯趙庸平陽春侯官縣侯  
寇奏捷勅諭曰嶺南民入籍既久屢叛征服朕非得已  
舊歲命卿鎮撫其地惟陽春之盜出沒標掠久爲後患  
卿以兵剿平捷報至京朕甚爾嘉但所奏俘囚數多朕  
思凡民之亂由有司不能撫卹以致作亂可曾都布二  
司取俘囚中首惡誅之協從釋歸田里庸得勅斬首賊  
李佛蔭數人餘皆得免十一月趙庸擊潮州賊禽賊首  
偽萬戶饒海一百五十人斬四千級釋脇從千餘人廣  
州海寇曹真自稱萬戶蘇文卿自稱元帥合山賊單志  
道李千文李平於湛菜大步小亨鹿步石灘鐵場清遠



大羅山等處據險立寨攻掠東莞南海及肇慶翁源諸縣趙庸率步騎舟師一萬五千餘人分道擊之進至鹿步卒與賊遇山深道阻官軍與賊多陷沒者賊亦傷死甚多已而賊構大步車焚塘諸壘急趨南雄庸率精銳與賊賊勢稍怯會廣東叅政閔純于戶張會率軍民來援併力擊破之賊乃棄資裝器械水中駕虛舟而遁我軍乘快嗣追之擒一千七百餘人獲舟六百餘艘復遣指揮徐質等帥師攻鹿步葵涌石灘清遠雷鄉諸寨轉攻湛菜小龍水皆大敗之擒賊二萬餘賊屬八千有奇斬首五千餘招降縣民三千三百餘戶復業漳州龍巖

縣民作亂自立

侵掠旁郡指揮使僉事孫皓朱貞

等討平之延安侯唐勝宗率兵討衡處溫山寇擒賊首  
吳達三葉丁及其黨三千三百餘人家屬一千五百餘  
人斬二百八十級餘寇遂平四川水盡源通塔平散毛  
諸洞長官作亂命周德興移兵討之仍命汝南侯梅思  
祖都督僉事張銓爲之副時德興帥師征五溪蠻蠻人  
散走及是命復討諸洞皆平之

十五年壬戌趙庸進兵討東莞諸盜凡克寨十二擒賊  
萬餘人斬二千級又破石鼓赤嶺等寨擒僞官百餘人  
其黨潰散海陽縣賊曹名用聚衆殺掠庸調指揮僉事

詹繼捕之追至崑崙山黃鶯畝擒名用并其黨悉誅之  
并擊乳源山蠻盡俘其衆因籍屋戶萬人爲水軍六月  
四川茂州土官知州楊者七謀作亂官軍捕斬之初大  
軍克茂州者七來降就以爲知州至是陰結生番約日  
伏兵陷城有小較密告于衛遂發兵捕斬者七生番不  
之覺如期入寇官軍掩擊敗之於是盡徙羌民居於城  
外海南會同文昌二縣蠻莫不祖等作亂都指揮王臻  
討平之八月萬儋二州民陳鼎叔等作亂陷陵水縣官  
軍擊斬之十一月普安軍民府知府者額辭歸 上諭  
之曰王者以天下爲家聲教所暨無間遠邇况普安諸

郡密邇中國慕義來朝深可嘉也今爾旣還當諭諸酋  
長凡有子弟皆令入國學受業使知君臣父子之道禮  
樂教化之事他日學成而歸可以變其土俗同於中國  
豈不美哉復賜者額金帶及織金文綺帛鈔遷東莞增  
城三縣降民三萬四千四百餘于泗州屯田趙庸旣平  
羣盜俘其首逆王者至京遂班師

十六年癸亥九月命鄧鎮爲征南將軍臨江侯陳鏞濟  
寧侯顧敬爲左右副將軍率兵討龍泉等縣山寇時廣  
東徭賊作亂剽掠旁近由是江西永新龍泉山民互相  
煽動結聚徒黨自稱順天王勢甚猖獗江西都指揮同

知戴宗率兵勦捕不克至是命鎮等將兵往討十月詔授武定軍民府女知府商勝誥曰朝廷政治遐邇弗殊德在安民宜從舊俗惟爾黔中之地官皆世襲間有婦承夫位者民亦信服焉前武定府土官洪叔之妻商勝質雖柔淑志尚剛貞萬里來歸誠可嘉尚是用錫之以衣冠表之以顯爵仍撫其民以尊聲教可特授中順大夫武定軍民府知府爾其小心事上保境安民以稱朕一視同仁之意於是并賜勝朝服及織金羅衣紗帽金帶已亥廣西都指揮使耿良言田州府知府岑堅泗城州知州岑嘉忠率其土兵討捕猺寇多樹功績臣欲令

其選取壯丁各五千人立爲二衛以嘉忠之子振堅之子永通爲千戶統其兵俾之守禦且耕且戰此古人以蠻夷攻蠻夷之策也如此則官軍無遠戍瘁腐之患民免饋運之勞矣詔是其言行之

十七年甲子龍泉諸山寇悉平閏十月象州土吏覃仁用言其父景安故元時嘗任本州巡檢有兵獍二百人今皆爲民請收集爲軍上不許因諭之曰兵獍旣爲民矣國家之兵豈少此二百人朕嘗下令凡故元時士卒隸民籍者不許相告豈可以爾之一言格朝廷之令乎

十八年乙丑正月慶遠府東蘭州蠻寇韋富撓作亂廣西都司發兵討平之富撓之先自唐宋以來據有東蘭西蘭二州儂智高反時竄匿山谷迄故元富撓之父晏勇仍據東蘭至洪武十二年富撓遣家人韋錢保詣關上啟元所授印貢方物錢保匿富撓名以爲已物朝廷初不知因以錢保爲東蘭知州旣而錢保徵歛暴急山民不服遂從富撓作亂官軍討之擒其黨韋公煥始言錢保冒襲之故於是執錢保除官代之乃定四月柳州府馬平縣主簿孔性善言溪洞徭獞恃險竊發殺掠吏民及官軍討捕則退入深谷操強弓注毒矢潛守隘口

卒不能獲克頑自恣爲患益深乞於賊出沒之地立寨  
置兵扼其襟喉斷其出路譬猶穴中之鼠枝窮食盡可  
以盡勦然此雖賊盜豈無良心昔陳景來爲知縣徃徃  
皆應差役厥後長吏撫字垂方始復反側誠得良吏示  
以恩信諭以禍福彼雖克頑亦當革心向化 上嘉納  
命吏部凡臨溪洞郡縣擇守令撫輯之思州諸蠻洞作  
亂命信公湯和爲征虜將軍江夏侯周德興爲副從楚  
王楨討之蠻寇出沒不常和等師抵其地恐蠻人驚潰  
乃於諸洞分屯立柵與蠻民雜耕使不復疑久之計擒  
渠魁餘黨悉潰畱兵鎮之九月洞蠻吳百見等復寇古



州命楚王楨率湯和等進勦勅曰楚王尚幼未能練達軍務故遣湯和來總宿衛之兵以壯中軍凡軍旅之事卿自裁決然後啓王知之十月和等兵至古州分遣將士討上黃諸洞誘擒吳面兒送京師誅之諸洞悉平俘獲四萬餘人楚王還國和等仍駐兵撫輯其民

十九年巨津州土蠻阿奴照叛襲劫石門營千戶浦泉戰死指揮李榮等討之賊敗走追獲斬首

二十年六月廣西尋州知府沈信言府境連柳象梧藤等州山谿險峻徭賊出沒不常近者廣西叅議湯敬爲大享老鼠羅碌山生徭所官軍討之賊乃登陟巖崖

扳緣樹木捷如猿狖追襲不及若又駐兵則瘴癘時發  
兵多疾疫又難追取及至兵退則復出爲患臣以爲平  
南二縣舊附徭民皆便習弓弩慣歷險阻若選少壯千  
餘人免其差徭給與軍器衣裝俾各團村寨置烽火與  
巡檢司民兵相爲聲援協同捕逐可以拒之 上曰蠻  
夷梗化彼習使然使守土之官加意招徠自然向化何  
用殺戮若其無事但當謹防使不爲患苟爲患不已發  
兵致討何須團寨自困民力

二十一年四月廣西都司言各處洞徭占耕內地嘯聚  
劫奪居民被擾調兵收捕卽逃匿巖谷兵退復肆跳梁

請於秋成之時統率所部會永道諸衛官軍屯駐賊境扼其要害收其所種穀粟彼無糧食勢必自窮乘機擒戮可絕後患從之九月越州土酋阿資與囉雄州管長發束等叛命沐英會傅友德將兵討敗之阿資者土官海龍子也越州夷言爲苦麻部元木海龍居之部屬俱囉囉種王師征南時英駐兵其地之湯池山招諭來降卽以爲知州尋叛英討擒之徙遠東至蓋州死資繼其職益桀驁梗化至是叛賴公進兵過平夷以其山勢峭險密爾龍海宜築堡駐兵屯守以捍侵軼遂遷山民往居早上村雷千戶劉成等領兵千人樹柵置堡其地過

之斬其管

蒲巴清資遁去

二十二年

月傳友德等復擊走阿資土官普旦來降

時阿資既敗退屯普安倚崖壁爲寨友德以精兵感之蠻衆皆緣壁攀崖墮死者不可勝數生擒千三百餘人阿資遁還越州二月湖廣安福千戶夏得忠誘九溪洞蠻作亂詔東川侯吳海普定侯陳桓靖寧侯葉昇討之海等駐兵賊境昇獨潛兵出賊後掩擊遂擒得忠送京師斬之傳友德進平牛場叛蠻沐英遣都督甯正從友德擊阿資於越州敗之斬其黨火頭弄宗等五十餘人阿資窮蹙與其母請降初阿資之遁也揚言曰國家

有萬軍之勇而我地有萬山之險豈能盡滅我輩英乃  
請置越州馬隆二衛扼其衝要又分兵追捕至是勢窮  
遂降捷至命諸將分屯近地諭曰西南蠻夷盤據山川  
高廣無際草木叢密毒氣薰蒸兵入易生疾疫所以功  
多不就今大勢已定然諸蠻易動生亂大軍一回彼復  
囁聚跳梁再舉爲難且還軍分據要地一以休息士卒  
一以鎮定夷情凡七月友德以疾召還諸將皆還十二  
月通政司經歷楊大用諭思倫發服罪獻首逆者  
二十三年正月蜀王奏西番蠻人作亂燒里厓關都督  
瞿能等兵萬三千人從涼公藍玉往大渡河邀擊之獲

州山賊夏三連結諸洞蠻作亂胡海等兵三萬三千人討平之斬三千七百級獲萬三千餘擒夏三俘其黨三千五百餘人二月涼公猷捷臬土官副使觀著俘男女數千人并克散毛洞擒酋刺惹單大旺等萬餘人分兵破諸小寨殺獲又數千人施南土官單大勝作亂擒斬之其地悉平廣東都指揮使馬騏等擒龍川賊蘇文山等械送至京磔於市脅從者宥之 四月藍王奏散毛鎮南大旺施南等洞蠻人叛服不常黔江施州雖有衛兵相去懸遠緩急卒難應援今散毛地方大水田與諸蠻洞相連宜置千戶所守禦至是命千戶十山等領西

陽土兵一千五百人置所於大水田鎮之五月巳酉播  
州貴州宣慰使司并所屬宣撫司官各遣其子來朝請  
入太學上諭國子監官善爲訓教俾有成就庶不負遠  
人慕學之心

二十四年五月指揮同知花茂收集沿海民兵茂在廣  
州嘗勦平陽春等縣叛賊及清遠英德翁源博羅東莞  
增城龍川興寧歸善南海香山諸縣及海南雷州等處  
山寨猺蠻至是倭賊來寇因上言廣州地方若東莞香  
山等縣連連蛋戶附居海島遇官軍則稱捕魚遇番賊  
則同爲寇不時出沒劫掠人民殊難管轄請徙其人爲

兵廢革前患又奏添設濱海依山碣石神電等二十四  
衛所城池收集海民隱料無籍等軍守禦仍於要害山  
口海汊立堡撥軍屯守 詔皆從之尋命安陸侯吳傑  
永定侯張銓等訓練廣州等衛所官軍以備茂仍出兵  
盡平潭源諸峒西山獠人盤窮腸爲暴擄其巢設立徭  
首統領徭甲河源縣民黃士柯作亂劫掠鄉村田多荒  
蕪知縣鄧文張奏除荒田糧米五千九百七十四石流  
者復業民皆安之瓊州黎自 國初歸附以來土酋主  
郡主兵長子孫盡發爲民以峒管之至是惺首漸肆崖  
州多簡及千家村會同麻白等處僞千戶蔡斌安定光



螺木文昌白延等先後作亂花茂率諸將皆討平之茂  
尋卒贈官子英仍任守臣上言通番之弊 詔嚴飭凡  
將違禁物貨私自下海潛往外國賣買巡海官軍不用  
心設法擒拿以致誘賊擅入內地因而被殺者全家解  
京重治罪十一月阿資復叛都督僉事何福爲平羌將  
軍征之兵至越州官軍進攻連捷俘獲甚衆會淫雨不  
止山水汎溢阿資援絕與其衆何福擇曠地置柵以處  
其衆

二十五年正月何福討雲南都勻所部諸蠻克之誅叛  
酋安輯其民進兵征五開等處洞蠻福又遣人奏故宣

慰使靄翠妻奢香亦桀驁不服請并討上以非稔惡不許三月建昌衛指揮使月魯帖木兒叛上命藍玉總兵討之復以玉在甘肅道遠命都督聶緯權總兵徐司馬爲左副翟能爲右副率所部及陝西步騎征之俟玉至緯與司馬等皆爲之副能等兵至栢興州月魯帖木兒欲遁去恐我追之乃遣人請降諸將皆曰此必詐也宜乘勢擊之能不聽歛兵以待遣使馳報賊果逸去追之不及玉至軍中勅曰翟能等朕委以討賊乃失機敗事當寘諸法姑宥俾立功自贖彼月魯帖木兒等皆無父無君詭詐萬狀方大軍入境遽信其降歛兵以待

爲其所玩比又遣人到京往來之間則彼之塞柵已修  
糧餉已足孽畜之類已收精銳之兵已選於戰則難圖  
決勝非過而何卽今彼寨中逸出者不論多寡盡拘收  
之切莫縱還彼黨與最兇頑者一楊把事及達達千戶  
二人速宜捕執賊若遣使羈之勿令復去來降密爲之  
防月魯帖木兒亂魁必擒之而後已其栢興州賈哈喇  
境內摩些等部須除其克渠然後宥其餘衆俾耕牧以  
供賦稅七月能進討至雙狼寨攻破之擒僞千戶段太  
平等其衆大潰

詳三十一年

月魯帖木兒遁去能督兵追捕

攻破諸寨先後俘殺千八百餘人月魯帖木兒遁入栢

興州九月雲南會川土官知府王春作亂指揮僉事俞  
輔等擊降之先是月魯帖木兒叛沐英遣輔將兵攻討  
至金沙江卒遇蠻寇擊破之聞春已陷會川千戶劉成  
戰死輔遂引兵趨會川分擊迷易等處獲其黨三千餘  
人春敗走追至金沙江勒兵搜捕春結陣以待縱兵擊  
之春復敗走始遣人納降十一月藍玉兵次栢興州遣  
百戶毛海以計誘致月魯帖木兒并其子胖伯送京師  
其衆皆降玉因奏四川之境地曠山險控扼西番連歲  
蠻夷梗化蓋由軍衛少而備禦寡也宜增置屯衛下羣  
臣議行之玉又奏四川軍士少請籍民丁爲兵長河河

西朶甘百夷地相連屬恃其險遠久不入貢請兵致討  
上報曰籍民爲軍甚不可其民連年供輸煩擾又以壯  
者爲兵其何以堪況克渠已殄人知順命雖獷悍者漸  
革其習戍守軍士皆有成規何用增益重困吾民乎其  
長河西朶甘百夷之事朕惟兵久在外不可重勞但養  
銳蓄威徐議大舉此非四十萬衆不可行今爾所統之  
兵選甯守禦餘令回衛爾卽回京玉遂班師能凱亦還  
成都十二口都督僉事楊春討靖州綏寧蠻寇楊晟禮  
平之晟禮自洪武十八年拒命不供賦稅至是春督兵  
進攻斬蠻人數百俘男女千人其黨遁散

二十六年十一月戶部奏貴州宣慰司水東所統異種蠻民言語不通雖承納租賦而近年逋負益多逃走隣境無從徵納沐春亦言水西土官需翠所納稅糧八萬石連年遞減至二萬石尚不能供上曰蠻夷之人其性無常不可以中國治之但羈縻之足矣其貢賦之逋負者悉免徵逋徙者招諭復業

二十七年十一月阿資復叛西平侯沐春都督何福等討之營於越州城北都指揮李得徐毅分道四面急攻又別遣指揮何琪俞輔領壯士伏於岐路以兵挑戰蠻寇悉眾以出伏兵四起縱擊大敗之阿資復脫走

二十八年正月沐春何福等討阿資平之初阿資遁去  
時曲靖土軍千戶阿保張麟所守之地與越州相接其  
部屬多與之貿易春使人陰結阿保等令覘知阿資所  
在於其經行之地多列守堡絕其糧道阿資困急福潛  
引兵屯赤窩鋪遣百戶張忠等擣其寨擒阿資斬之俘  
餘黨越州遂平二月詔都督府榜諭龍州土官趙宗壽  
等先二十一年九月土官趙貼堅卒無子其侄宗壽襲  
爲土官知州已而鄭國公常茂以罪謫居龍州貼堅妻  
黃氏有二女其一爲太平州土官李圓泰妻而茂納其  
爲妾方是時宗壽雖襲職貼堅妻猶持土官印與茂

圓泰專擅州事數凌逼宗壽會茂以病卒其闈者趙觀海等亦肆侮宗壽宗壽乃與其把事等以計取土官印上封章言茂已死并械觀海等至京於是貼堅妻惶懼使人告宗壽擄掠又與圓泰謀劫茂妾并其奴俾往太平州及趙氏祖父官誥諸物盡掠取之又欲并取龍州之地乃自至京告宗壽實從子不應襲宗壽亦上章言狀上詔宗壽勿問止議貼堅妻與圓泰罪旣而以蠻夷遠人俱釋之至是有人告茂匿龍州未死前宗壽所言皆妄遂詔都督府榜諭如茂果存送至京師贖罪如復違令大軍討捕罪在不赦茂果死宗壽親率大小頭



目至京具陳其由四月廣西復言宗壽拒命不出又言  
奉議南丹等處蠻人梗化 上命兵部尚書致仕唐鐸  
賁勅往諭宗壽不從命五月詔發湖廣江西衛所馬步  
官軍六萬餘及諸衛達達官軍各賞三月糧期以秋初  
俱赴廣西從大軍進征龍州奉議等處四川宋儼茶洞  
蠻賊田大蟲作亂都司發軍征勦賊走寶靖指揮楊錦  
率兵與寶靖民兵追擊斬大蟲等二百 人七月廣西  
都指揮韓觀捕獲宜山等縣蠻寇二千八百餘人斬僞  
大王韋召僞萬戶趙成秀韋公旺等傳首京師時盛暑  
官軍多病瘴 上命觀還軍廣西八月左都督楊文佩

征南將軍印韓觀都督僉事宋晟爲左右副將軍劉真  
爲叅將率京衛軍三萬人至廣西會各處軍馬討趙宗  
壽及奉議南丹向武等州叛蠻遣禮部尚書任亨泰御  
史嚴震直使安南諭以討宗壽之故命其王陳日焜輸  
米二萬石諭楊文調南寧衛兵千人江陰侯吳高領之

柳川衛兵千人安樂侯吳傑領之皆令從征

先是高等以事獲罪

故俾征討建  
功以自贖

唐鐸還京言宗壽伏罪來朝乞罷兵勿征

詔楊文移兵奉議等處仍命鐸至軍叅議軍事九月宗  
壽偕耆民儂里等六十九人來朝謝罪貢方物征虜前  
將軍指揮僉事胡冕等進兵追捕柳桂西山養牛諸洞

山賊擒賊首康節孫等斬之十月楊文等駐師奉議州之東南分兵追捕賊黨且遣人招降脅從者賊皆憑險自守文屢攻破之賊衆潰散韓觀等分兵追討都康向武諸州縣破其更吾蓮花大藤峽等寨斬賊首黃世鐵并其黨一萬八千三百六十餘人蠻寇遂平唐鐸會諸將相度山川形勢置奉議等衛并向武河池懷集武仙賀縣等處守禦千戶所設官軍鎮守雲南都指揮同知王俊至廣南築城建衛上官儂貞佑疑不自安因結羣蠻據山寨拒守俊遣人招之不服輒伏兵劫掠覘視官軍進退俊乃與將佐謀曰貞佑小醜敢拒命者與諸寨

羣蠻互爲聲援故也今彼大寨馮險固守故各寨恃之以爲官軍不敢近兵法曰善攻者敵不知所守宜出不意亟取之彼各自救不暇貞佑必擒矣乃遣指揮同知歐慶等分兵攻各寨自將取貞佑又以兵扼間道絕其救援于是諸寨悉破賊衆潰散貞佑窮蹙就擒械送京師因命慶署衛事鎮守

二十九年征虜前將軍指揮僉事胡晃率兵至郴桂征勦山寇分遣指揮僉事宋晨等討平廣東潭源諸洞及廣西平川霑益之地凡斬馘數千人生擒賊首呂法子等八人械送京師上以法子等罪不可宥命戮於市

胡冕宋晨等雖有平蠻之功縱殺太過戒諭之顧成擊

水西蠻功最著古州蠻林寬作亂詳貴州一則死事者龍里

千戶吳得鎮撫井孚蒙贈卹平茶千戶紀達善戰蒙賞

其思倫發竟爲幹孟所逐詳麓川一則

三十年正月沔縣吏高福興及土民田九成等僧李普

治謀亂縣教授王璞告于漢中衛衛遣兵捕普治獲之

九成等率餘賊入沔後河及天門聚衆千餘人陝蜀間

番民因之作亂福興兵次陽平關賊黨大集有何如順

者號天王突出逆戰官軍爲其所敗賊遂引衆入畧陽

縣治殺知縣呂昌執教諭呂銑復燒徽州治殺學正

顏叔彬詔征西將軍長興侯耿炳文武定侯郭英討之  
勅秦王尚炳練兵備不虞仍諭炳文英曰四川陝西兩  
界相接之地自定天下以來番漢頑民多潛遁山谷間  
不供征徭不懼法度近高福興等并山賊作亂爾等討  
之大軍旣至其良善者招諭付所司編管爲軍餘不順  
化者必平之方可班師山深道險難以騎戰如軍中有  
馬宜發還都司牧養止留二三千可也應有機務條列  
以聞四月平羌將軍都指揮齊讓討古州叛蠻來降者  
多留之軍中 上諭曰爾招諭蠻民降者留寘營中此  
豈兵家受降處置之法凡營壘曲折兵馬動靜彼豈不

知一旦背叛必有倉卒不測此事切當慎之昔元時洞蠻作亂調三省軍馬征之蠻人詐降厚以金帛賂其平章及左右之人平章遂推誠不疑其詐賊迺乘其無備夜入營生擒平章以去衆皆不知又關而奴之以爲戲笑此覆轍可鑒自今降者當詢其山川地里人口錢糧預爲籌畫然後散其部曲收其器械庶幾不墮其詐易于勦滅爾其慎之尋以逗遛無功命楊文佩征虜前將軍印韓觀副之往代清平衛奏黔陽辰溪等處蠻民相扇爲亂勅楚王禎討之九月炳文等進兵沔縣遣都指揮同知吳旺俞瑱等領兵分道並入福興奔竄無所遂

就擒并獲其黨汪伯功等悉誅之宥脇從者爲軍凡四千餘人十一月命都督僉事徐凱指揮使黃中孫禧將兵討叛酋賈哈刺諭曰賞罰明信行軍之要賈哈刺雖一賊功賞不立何以擒之軍上有能斬首獻者賞白金二千五百兩斬一從賊者賞銀錠一兩等師往必申明此令

三十一年二月楊文等奏元平吉州林寡何黨并僞獲三十岡等處洞蠻三千人惟潰入山者未盡勦絕邊軍士多病乞分往近地辰溪等處就糧操練以俟秋成進取餘寇上以餘寇多脇從不必窮追詔文等還京



徐凱等乎卜木瓦寨執叛酋賈哈刺送京誅之賈哈刺  
麼步土豪也初王師克建昌授以指揮俾領其部落後  
與月魯帖木兒叛走據卜木瓦寨其地峻險三面陡絕  
下臨大江江流悍急不可行舟惟一道僅通人行官軍  
至輒自上投石遂爲所扼不得進及是凱等至斷其汲  
道困之寇不得水窮促乃督將士力攻寇不能支遂就  
擒思倫亦得還麓川西南皆平

皇明大事記卷之十二終

皇明大事記卷之十三

朱國禎輯

諸夷朝貢

洪武元年十二月遣符寶郎俛斯奉 璽書賜高麗國王王顥尚賓館副使劉迪簡資詔往諭安南沒於南寧漢陽知府易濟代大略言東南征討已定遂平西北萬里肅清復我中國帝王舊疆臣民推戴卽 皇帝位建元洪武定有天下之號曰大明四夷君長未報故特遣使斯泛海至高麗風順一日而至國人皆驚報于王顥自率兵來迎稱臣接詔拜舞奉歸國其年大旱忽霖雨

人以為瑞濟自欽州抵安南迎接如儀時皆未賚賞賜  
使臣諭意卽行固留以上命止之且曰以爾順逆爲  
度非封國卽用兵此特先試耳皆謝曰世世伏事中國  
况 皇帝創業非常敢不倍加恭順以永平安之福于  
是皆以次入貢請封禮部先定冊封禮儀號從前王議  
從新授使臣往賜一品服與王用平禮王稱臣其下皆  
稱陪臣著 祖訓以二國首先歸附子孫不得用兵征  
伐後安南篡弑作逆用大兵終淪化外朝鮮恭順永爲  
外藩各自有紀

二年二月占城國王阿答阿者遣使臣虎都蠻貢虎象

方物先已遣吳用顏宗魯楊載等使占城爪哇日本等國至是其貢使適至賜璽書曰今年二月四日虎都蠻奉虎象來獻朕乚具悉然都蠻未至我使已在途矣朕之遣使正欲報知曩者我中國爲胡人竊據百年遂使夷狄布滿四方廢我中國之藝倫朕是以起兵討之垂三十年芟夷旣平朕主中國天下方安恐四夷未知故遣使以報諸國不期王之使者先至誠意至篤朕甚嘉焉今以大統曆一本織金綺段紗羅四十疋專人送使者歸且諭王以正果能奉若天道使占城之人安于生業王亦永保祿位福及于鄰上帝實監臨之王其勉圖

勿怠虎都蠻及從者亦麥文盛影漁左賜瓜哇國王璽  
書略同惟云使者已行照玉璽人等某丁前奉使于  
元還至福建而元亡因來居京師朕念其義離本土必  
深懷念今復遣人送還五月諭吐蕃詔曰昔我帝王以  
道德治中國民用和睦推及四夷莫不安靜向者胡人  
竊據華夏百有餘年冠履倒置凡百有心孰不興憤比  
歲以來胡君失政四方雲擾群雄分爭生靈塗炭朕乃  
命將率師悉平海內臣民推戴爲天下主國號大明建  
元洪武式我前王之道用匡黎庶惟爾吐蕃未卽歸命  
自外生成上違天道後悔無及尋復遣陝西行省員外

耶許允德往招諭之九月定蕃王朝禮禮官攷朕湯之  
時氏羌遠夷來享來王太戊之時重譯來朝者七十六  
國周武王克商大會諸侯及四夷作王會圖周禮秋官  
象胥氏掌夷貊戎狄之國使而諭詭焉漢設典客及譯  
官令丞以領四夷朝貢及設典屬國及九譯令武帝元  
鼎六年夜郎入朝自後外夷朝貢不絕甘露元年呼韓  
邪單于來朝三年呼韓邪單于稽居柁來朝並見于甘  
泉宮治平元年四夷來朝領於大鴻臚四年匈奴單于  
朝正月引見于白虎殿元壽二年單于來朝舍之上林  
苑葡萄宮順帝永和元年倭奴王來朝皆有燕享賜予

之制唐設主客郎中掌諸蕃來朝接待之事有四曰迎勞曰餼見曰蕃王奉見曰燕蕃國王其儀爲詳貞觀三年東蠻酋長謝元深等及突利可汗來朝皆宴饗以樂之宋朝奉貢者四十餘國皆止遣使蕃王未嘗親入朝朝見之禮載禮書者與唐畧同元太祖五年畏吾兒國王奕都護來朝世祖至元元年勅高麗國王植令修世見之禮六月植來朝上都其蕃國年朝俟正旦聖節大朝會之日行禮今定其儀凡蕃王來朝至龍江驛驛官具報應天府府報中書省及禮部禮部以聞遣侍儀通贊舍人二員接伴遣應天知府至館以賓主接見東西

座具宴次第送入會同館禮部尚書奉旨館中宴勞相  
見及宴享如龍江驛明日中書省奏知命官詣館如前  
宴勞蕃王及其從官具服於天界寺習儀三日朝見賜  
宴謹身殿朝皇太子賜宴文華殿十二月遣翰林院編  
修羅復仁兵部主事張福賚詔諭安南占城國王詔曰  
朕本布衣因天下亂起兵遂承正統今年三月海內諸  
國入貢者安南最先高麗次之占城又次之皆能奉表  
稱臣合千古制朕甚嘉焉近占城遣平章蒲旦麻都來  
貢言安南以兵侵擾朕觀之心有不安念爾兩國自古  
及今封疆有定分不可強而爲一此天意也况爾等所



居之地相去中國越山隔海所侵擾之事是非一時難知以朕詳之爾彼此世傳已久保土安民上奉天道尊事中國爾前王必有遺訓不待諭而知者朕爲天下主治亂持危理所當行合遣往觀其事諭以畏天守分之道如果互執兵端連年不解荼毒生民上帝好生必非所悅恐天變于上人怨于下其禍有不能迺者二國之君宜聽朕言各遵其道以安其分庶幾爾及子孫皆享福于永久豈不美歟詔至兩國皆聽命罷兵

後復仁等還朝辭其

所饒黃金上嘉之加賜使臣莫季龍還

遣中書省管勾甘桓會同館副

使路景賢封占城國王阿答阿者爲王詔曰咨爾占城

國王阿答阿者素處海邦定居南服惟爾祖父世篤忠貞嚮慕中華恪守臣職朕今混一四海撫馭萬方欲率土之咸寧嘗馳書以往報惟爾能畏天命尊中國卽遣使稱臣來貢方物思法前王之訓以安一境之民朕茲忠誠良可嘉尚是用遣官資印封爾爲占城國王於戲居中撫外朕方一視同仁保境安民爾當慎終如始永爲藩輔以勉令名今賜洪武三年大統曆一本及織金文綺紗羅四十疋復賜民間檢用曆本當勞其使蒲且麻都文綺羅一疋仍賜以冠帶其從者皆有賜賚

三年正月庚子遣使往安南高麗占城祀其國山川至

期 上齋戒親爲祝文是日臨朝授使者香幣香 一

盒幣一文綺幡二道隨其方色祝版 上自署勅書

給白金二十五兩具祭物使者人賜白金十兩及衣物  
而遣之仍命各國圖其山川及纂錄其碑碣圖籍附使  
者還所至諸國皆勒石紀其事略曰朕賴天地祖宗眷  
祐位于臣民之上郊廟社稷以及嶽鎮海瀆之祭罔敢  
不恭邇者占城安南高麗遣使奉表稱臣已封其王其  
國境內山川悉歸職方考之古與天子望祭雖不親臨  
然未聞有遣使至祭于其境者朕思普天之下咸仰太  
平之治故奠牲幣遣使徃告古城安南高麗山川俾其

國王世保境土使風雨以時年穀豐登民庶得以寧靜  
庶昭朕一視同仁之意是用刻石以垂永久三月遣萊  
州府同知趙秩詔諭日本安南

四年五月魏國公旣破王保保分鄧愈招諭吐蕃先一  
年吐蕃入寇洮河甯正擊大破之窺伺未已然震懼不  
敢動魏公曰先撫隨以兵無勿克者遂命愈駐洮州吐  
蕃院使馬梅遣管不失結等來降貢馬及方物至是偕  
孛羅罕等來朝復貢馬及鐵甲刀箭 詔以梅爲和州  
指揮僉事孛羅罕爲正千戶管不失結爲百戶及其部  
屬以下各賜襲衣命僧克新等三人徃西蕃仍圖山川

地形以歸陝西行省土番宣慰使何鎖南普等以元所授金銀牌印宣勅及鎮西武靖王卜納刺亦以土番諸部來降以上皆三年事七月占城國王阿答阿者遣其臣答班瓜卜農來朝奉表言安南侵其土境表用金葉長一尺餘濶五寸刻以本國書俾譯者譯之其意曰大明皇帝登大寶位撫有四海如天地覆載日月照臨阿答阿者等草木耳欽蒙遣使以金印封爲國王感戴欣悅萬萬恒情惟是安南用兵侵擾疆域殺掠官吏伏願皇帝垂慈賜以兵器樂器樂人俾安南知我占城乃聲教所被輸貢之地自然不敢欺凌上感其意及答班瓜

上降辭命中書移咨國王云占城安南旣皆臣事朝廷同奉正朔而乃擅自備兵毒害生靈旣失事上之禮又乖交隣之道已咨安南國王卽日罷兵本國亦宜各保疆土所請兵器于王何惜但以占城安南互相爭奪而朝廷獨賜占城則是助爾相攻甚非撫安之義又所請樂器樂人在聲律雖無中外之殊而語音則有華夷之異難以發遣若爾國有習中國華言可教以音律者選擇數人赴京習之并諭福建行省占城海舶貨物皆免征以示懷柔之意淳泥國王馬合漠沙遣其臣亦思麻逸表箋貢方物先是上命御史張敬之福建行省

都事沈秩使其國至是其王遣使隨秩等人貢有鶴頂  
生玳瑁孔雀梅花龍腦米腦糠腦西洋白布及棒香黃  
蠟等物表用金箋用銀皆刻步字體彷彿回鶻賜其  
國王織金文綺紗羅及其使者綺帛有差淳泥在西南  
大海中所統一十四州閩婆屬國也去閩婆四十五日  
程產名香異物國王以金佩刀吉日八布遣敬之等辭  
不受遣佛麻國故民捏右倫持詔往諭其國并諭雲南  
八番烏撒等蠻又遣工部主事王伯彥往河州賜山後  
七驛世襲土官勞哥等文綺銀碗九月三佛齊國王馬  
哈刺孔八刺卜遣其臣王的力馬罕亦里牙思奉金表

來朝貢黑熊火雞孔雀五色鸚鵡及諸香毘羅綿被苾  
布等物先是遣趙秩等使其國告以卽位建元平定期  
漢之意至是秩還其國使隨入貢賜賚日本遣使朝貢  
上御奉天門諭省府臺臣曰海外蠻夷之國有爲患于  
中國者不可不討不爲患者不可輒自興兵古人有言  
地廣非久居之地民窮乃易亂之源如隋煬帝妄興師  
旅征討琉球殺害夷人焚其宮室俘虜男女數千人得  
其地不足以供給得其民不足以使令徒慕虛名自敝  
中土載諸史冊爲後世譏朕以諸蠻夷小國阻山越海  
僻在一隅彼不爲中國患者朕決不伐之惟西北胡戎



世爲中國患不可不謹備之耳卿等當記所言知朕此  
意十一月真臘國巴山王忽兒那遣其臣柰亦吉郎等  
進表貢方物賀明年正旦賜賚十二月暹羅斛國王叅  
烈昭昆牙遣其臣柰思但儋刺識悉替等來朝進金葉  
表貢馴象六足龜及方物并賀明年正旦使還皆加賜  
賚上諭大都督府臣曰朕以海道可通外邦故嘗禁  
其往來近聞福建興化衛指揮李興李春私遣人出海  
行賈則濱海軍衛豈無如彼所爲者乎苟不禁戒則人  
皆惑利而干於刑憲矣爾其遣人諭止嚴爲之禁犯者  
論如律

五年正月瑣里國王卜納的遣其臣撒馬牙擦嘉兒幹  
的亦刺勿八兒山奉金葉表貢馬一匹紅撒哈刺一連  
紅八者藍布四疋紅番布二疋覲米里布四疋白苾布  
四疋珠子項串一副并繪其土地山川以獻前三年六  
月遣塔帖木兒持詔諭其國始與俱來 上謂中書省

臣曰瑣里世稱遠裔涉海而來難計年月其朝貢無論  
疏數厚徃薄來可也賜之加厚待制王禕諭雲南暹羅  
斛國遣其臣寶財賦等奉表貢黑熊白猴蘇木胡椒及  
丁香等物遣楊載諭琉球國曰朕既卽位詔諭外夷使  
者所至蠻夷酋長稱臣入貢惟爾琉球在中國南東遠

處海島未及遣報茲特諭爾知之瓜哇國王昔里八達  
刺蒲遣其臣八的占必等從常使胡克敬來朝上金葉  
表貢方物納元所授宣勅三道占城國王遣其臣陽寶  
摩訶入的弗祿等來貢方物琉球國中王察度遣弟泰  
期等奉表貢方物賜如占城以後皆土蕃略烏斯藏貢  
物鄧愈討大破之

六年正月置西寧衛初大軍取關陝元甘肅行省右丞  
朶兒只失結任青海來朝進馬 上賜以文綺令還招  
其舊部曲朶兒只班等不從遠遁只失結自率所部二  
千餘人還西寧遣弟資答等赴京言其抗命之狀及宋

國公馮勝西征遂以所部從行勝命只失結同指揮徐景追襲朵兒只班獲其金銀印及軍士馬馳甚衆遣其弟答麻送京至是立西寧衛令只失結爲指揮會事烏思藏伯木竹巴灌頂國師章陽沙伽監藏遣酋長鎖南藏卜以佛像金字書舍利來貢詔置佛寺賜使者文綺襲衣二月置烏思藏朵甘衛指揮使司宣慰司二元帥府招討司四萬戶府十三千戶所四以故元國公南哥思丹八亦監藏等爲指揮同知副使元帥招討萬戶等官九十六人以攝帝師喃加巴藏卜爲熾盛佛寶國師先是遣員外郎許允德使吐蕃令族酋長舉故官至京

授職至是喃加巴藏卜以所舉故元國公南哥思丹八  
亦監藏等來朝貢乞授職名省臺臣言來朝者宜與官  
職未來者宜勿與上曰吾以誠心待人彼若不誠曲  
在彼矣況此人萬里來朝若俟再請豈不負遠人歸嚮  
之心遂皆授職名賜衣帽鈔錠仍遣詔諭朶甘烏思藏  
等處曰我國家受天明命統馭萬方恩撫善良威武不  
朕凡在幅員之內咸推一視之仁近者攝帝師喃加巴  
藏卜以所舉烏思藏朶甘思地面故元國公司徒各宜  
慰司招討司元帥府萬戶千戶等官自遠來朝陳請職  
名以安各族朕嘉其識達天命慕義來庭宜從所請以

綏遠人以攝帝師喃加巴藏卜爲熾盛佛寶國師給賜  
王印南哥思丹八亦監藏等朶甘烏思藏武衛諸司等  
官鎮撫軍民皆給印自今爲官者務遵朝廷之法撫按  
一方爲僧者務敦化導之誠率民爲善以共樂太平初  
玉人造賜喃加巴藏卜印旣成以進 上觀其玉未美  
亟命工易之其制獸鈕塗金銀印池仍加賜綵段表裏  
二十疋未幾辭歸命河州衛鎮撫韓加里麻等持勅同  
至西番招諭未附土酋後元帝師之裔項南監自是番  
僧有封灌頂國師及贊善王闡化王正覺大乘法王如  
來大寶法王者俱賜印誥令比歲或間歲朝貢置洮州

常陽十八族等處千戶所六百戶所九各族都管十七  
俱以故元舊官爲之海賈回回以番香阿剌吉爲獻阿  
刺吉者華言薔薇露也謂此香可以療人心疾及調粉  
爲婦人容飾 上曰中國藥物可療疾者甚多此特爲  
容飾之資徒啟奢靡却不受置西平衛以故元來降知  
院撒爾禮拜爲指揮僉事洮州三副使阿都兒等以出  
獵聚衆約故元岐王朶兒只班駐大通山黑子城入寇  
河蘭二州西寧衛千戶所者公孫哥等擊之斬其知院  
滿答立等百餘人千戶倫達力戰死寇遂散去九月占  
城國遣使上言安南以兵侵本國仗天朝威武敗之境

上謹使告捷 上語省臣曰外國各守境土其來久矣  
前年安南表言占城犯境今占城復稱安南擾邊二國  
皆事朝廷未審彼此曲直其遣人往諭各宜罷兵息民  
毋相侵擾仍賜文綺及其使者遣還十一月田儼等使  
緬國不至而還緬國在雲南之西南與八百國占城接  
境謂之緬甸元時最強盛麓川平緬皆服屬之 上聞  
其嘗通貢于元因遣儼與程斗南張禕錢允恭齎詔往  
使儼等至安南值占城以兵相攻道阻不通留二年餘  
不得進有詔召還惟儼至餘皆道卒暹羅斛國王叅列  
寶昆牙思哩哆囉祿遣其臣柰昭璽哆囉等上表謝因



貢方物其使臣亦自有獻 上命却其使臣所貢者  
王女兄叅烈思稭貢方物于中宮 詔却之後再進  
却十二月三佛齊國王怛麻來沙那阿者遣其臣八  
足翰來進金表二賀明年正旦并貢方物

七年三月暹羅解國使臣沙里拔來朝貢方物自言國  
本令其同祭思里儕刺悉議替人貢去年八月舟次島  
渚洋遭風壞舟漂至海南達本處官司收護漂餘蘇木  
柁杳堦羅綿等物來獻省臣以奏 上恠其無表狀詔  
言舟覆而方物乃存疑必番商也命却之 詔中書禮  
部曰古者中國諸侯于天子比年一小聘三年一大聘

九州之外蕃邦遠國則每世一朝其所貢不過表誠敬而高麗稍近中國頗有文物禮樂與他蕃異是以命依三年一聘之禮彼若欲每世一見亦從其意其他遠國如占城安南西洋瑣里瓜哇淳泥三佛齊暹羅斛真臘等處新附國土入貢旣煩勞費大甚朕所不欲今遵古典而行不必煩數其移文使諸國知之陝西行省員外郎許允德自西番朶甘烏思藏使還賜冠帶雜衣及襪五月西域撒里畏兀兒安定王卜煙帖木兒遣其府尉麻答兒千戶刺爾嘉來朝貢鎧甲刀劍等物撒里畏兀兒者韃靼別部也其地廣袤千里去甘肅一千五百里

東抵罕東西抵天可里北邇瓜州沙南界吐蕃居無城  
郭以氍毹爲廬舍產多駝馬牛羊至是來朝貢詔遣使  
賜卜煙帖木兒織金文綺四疋麻答兒等羅衣二襲仍  
命召其酋長立爲四部給銅印曰阿端曰阿真曰苦先曰  
帖里詔置西安行都指揮使司于河州陞河州衛指揮  
使韋正爲都指揮使總轄河州朶甘烏思藏三衛陞朶  
甘烏思藏二衛爲行都指揮司以朶甘衛指揮同知璦  
南兀卽爾管招兀卽兒爲都指揮同知詔諭之曰爾西  
蕃各族部屬聞我聲教委身納款已嘗頒賞授職建立  
武衛俾安軍民邇使者還言各官公勤乃職軍民樂業

朕甚嘉焉尚慮彼地廣民稠不立重鎮治之何以宣布  
恩威茲立西安行都指揮使司于河州其朶甘烏思藏  
亦陞爲行都指揮使司頒授銀印仍賜各官衣物其餘  
來朝者皆封爲灌頂國師玉印獅紐詔曰佛教興于西  
上善因溥及華夷雖無律以繩頑惟仁心而是則邇來  
西番入貢有僧公哥堅藏等深通典義志堅修雖曰  
遙聞特加爾號統治僧徒教中稱首於戲寂寞山房儔  
青燈而侶影踟躕跌磐石對皓月以忘情隨緣于錫杖芒  
鞋安分于草衣木食廣施妙利方契善符毋忽初西番  
兆日之地舊有造葡萄酒戶三百五十家至是其酋長

勘卜監藏等以所迭酒來獻 上謂中書省臣曰飲食衣服貴乎有常非常有而求之者則必有無窮之害昔元時造葡萄酒使者相繼于塗勞民甚矣豈宜効之且朕素性不喜飲況中國自有秫米供釀何用以此勞民遂却之使無復進賜酋長文綺襲衣遣還七月琉球國中山王察度遣其弟泰期等奉表貢馬方物 上皇太子箋貢方物如之十一月暹羅斛國王世子蘇門邦王昭祿群鷹遣其臣昭悉里直上箋于 皇太子千秋方物禮部以聞 上命引 使朝東宮獻之十二月熾盛佛寶國師喃加色藏卜及朶甘行都指揮同知鎖南兀

卽爾等遣使來朝奏舉土官賞竺監藏等五十六人詔  
增置朶甘思宣慰司及招討等司招討司六曰朶甘思  
曰朶甘籠答曰朶甘丹曰朶甘洽塘曰朶甘川曰磨記  
勘萬戶府四曰沙兒可曰乃竹曰羅思端曰列思麻千  
戶所十七改故元倫卜卒曰四族達魯花赤爲都管朶  
甘捕盜司爲巡檢司以賞竺監藏等七人爲朶甘都指  
揮司同知南哥思丹八赤監藏等七人爲烏思藏都指  
揮同知星吉監藏等十一人爲朶甘宣慰使川棚藏卜  
等八人爲朶思等六招討司官管者藏卜等五人爲沙  
兒可等萬戶府萬戶管卜兒監等十八人爲朶甘思等

一十七千戶所千戶速令一人爲倫卜卒曰四族都管  
監藏令占等三人爲朶甘巡檢司巡檢造員外許允德  
齎詔及誥印往賜之來使哈石監藏等賜衣衾帽靴遣  
還賞竺監藏誥文曰朕受天明命君主華夷凡諸設施  
務在安民凡四夷之長有能撫其衆而悅天心者莫不  
因其慕義與之爵賞以福斯民曩者西番效順爲置烏  
思藏行都司指揮使司以官其長使綏鎮一方安輯衆  
庶今復遣使修貢請官朕如其請特以賞竺監藏等爲  
某官爾其恪修職毋怠

八年五月遣內使趙成往河州市馬初 上以西番素

產馬其所用貨錢與中國異自更錢幣馬之至者益少  
至是命成以羅綺綾帛并巴蔡徃市之仍命河州守將  
善加撫循以通互市馬稍來集率厚其值償之成又宣  
諭德意自是番酋感悅相率詣闕謝恩而山後歸德等  
州西番諸部落皆以馬來售矣九月丙戌三佛齊國王  
僧伽烈字蘭遣其臣談蒙馬哈麻等從招諭拂菻國朝  
使普剌等來朝表貢方物十月暹羅斛國遣其臣婆坤  
岡信奉表入貢昭壇哆囉副之舟至占城遇風相失昭  
壇哆囉以八月至京先進所貢方物至是婆坤岡信至  
上其所進金葉表文十一月暹羅斛國舊明臺王世子



昭勅羅局遣使奈暴崙進金葉表文貢方物

九年四月刑部侍郎李浩先往琉球市馬至是歸得四  
十匹硫黃千斤國王察度遣其弟泰期從來朝表謝貢  
方物賜賚浩言其國俗市易不重統綺但貴磁器鐵斧  
等物自是賜予及市馬多用之九月暹羅斛國王遣其  
子昭祿群膺奉金葉表貢象及象牙胡椒蘇木之屬已  
而 上命禮部員外郎王恒齋詔及印綬往賜以中書  
省宣使蔡時敏爲之副且詔諭之十二月瓜哇國王八  
達那巴務遣其臣八智巫沙等上金葉表貢馬及白鹿  
孔雀犀角之屬

十年四月 命鄧愈爲征西將軍沐英副將軍討吐蕃  
先是吐蕃所部川藏邀殺使者鞏哥鎖南等故命愈等  
討之師分三道進覆其巢追至崑崙山斬首甚衆獲馬  
牛羊十餘萬遂遣涼州等衛將士分成碾北等處而還  
曲先衛指揮沙刺殺故元安南王卜烟帖木兒其子板  
咱失里殺沙刺以報父讎後板咱失里復爲沙刺部將  
所殺遣使立三佛齊國王麻那者巫里

十一年四月闍婆國王麼那陀南遣其臣淡岡把來朝  
貢苾布油紅布香苴菴等物溢亨國王麻哈刺惹答饒  
遣其臣淡岡麻都等奉金表貢番奴六人胡椒二千斤

蘇木四千斤及檀乳腦諸香藥百花國王刺丁刺者遺  
其臣八智亞壇等奉金表貢白鹿紅猴龜筒玳瑁孔雀  
鸚鵡哇哇倒掛及胡椒香臘等物

洪武二年  
彭亨

十二年正月洮州十八族番首三副使江舒朵兒嬰噶  
子烏都兒及阿卜商等叛據納鄰七塘之地命征西將  
軍沐英移兵討之二月命曹國公李文忠往河州岷州  
等處督軍英等兵至洮州故城番寇遁去我軍追擊獲  
土官阿昌等斬之遂於東籠山南川度地勢築城戍守  
遣使報捷且請城守事宜上曰洮州西蕃門戶今築  
城戍守是扼其咽喉矣遂命置洮州衛以指揮聶緯等

領兵守之勅李文忠曰二月二十五日報至知大軍已入西番朕思之自河州至西番多不過五六日今諸將已至其地勝負必決矣符至爾卽率師從洮州鐵城之地取道而出朕嘗有密諭當遵而行之事速宜成山西之軍卽令還衛洮州尤宜擇人守之再勅李文忠沐英等曰捷音至知番寇潰敗大軍見追餘黨西番已定河州二衛之兵止畱其一以一守洮州岷州守禦士卒不可輕動宜畱以鎮靜之鐵城諸地民多蓄積軍士可以自供凡有酋長皆送京師山西之兵聞遣還甚合朕意西涼寧夏之兵亦卽遣之陝西河南之兵步卒先還騎

士畱彼悉收西戎餘寇事在乘勢無至再三勅平羌將  
軍丁玉曰松潘僻居萬山接西羌之境朕豈欲窮兵遠  
討而蠻酋屢入爲寇擾我邊民命爾討之不得已也三  
月三日捷至知松州巴克卽運糧于容州進取潘州若  
盡得三州之地則疊州不須窮兵料彼聞大軍聲勢理  
必自服但宜高城深池擇士卒勇鷙者守納都疊溪之  
路其靑州驛道無阻遏者聽其出沒不守可也凡來降  
諸酋長必遣人朝朕親撫諭之勅至可分一軍先還四  
川別有調遣朶甘都指揮同知賞竺監藏灌頂國師答  
力麻巴剌遣使奏舉西番故官十六人爲宣慰招討等

官從之八月陝西都司械送番酋二十人釋之發戍海  
南陝西都指揮使司奏西番首賊雖已遠遁未卽擒獲  
大軍還後恐乘間出沒爲邊民患請發三千騎駐鞏昌  
臨洮彼若出沒卽乘機勦除 上報曰爾言是也但邇  
者天象數見不可輕動且以騎兵驍勇者就各衛操練  
有警卽出乃爲全策勅莊浪涼州碾北三衛指揮曰近  
碾北衛來報番將朶耳只巴部下來降備言朶耳只巴  
與阿卜商三副使烏合之由未審然否然不可不爲之  
備吾度其人馬不下數萬不久必將入寇爾等宜慎防  
之士馬不可輕動此時田禾已收野無所掠彼亦安能

又居此不過恃其衆多欲擾邊境宜按兵固守伺隙然後擊之既番寇來攻英大敗之生擒三副使等俘斬數萬人馬二萬牛羊橐駝二十萬九月占城國王阿答阿者遣其臣陽須文旦進表及象馬方物中書臣不以時奏內臣因出外見其使者以聞上亟召見歎曰壅蔽之害乃至此哉因勅責省臣曰朕居中國撫輯四夷彼至誠來貢者吾以禮待今占城旣至爾宜以時告禮進其使顧乃泛然若罔聞知宰相輔天子出納帝命懷柔四夷者固當如是耶丞相胡惟庸汪廣洋等皆叩頭謝罪詔釋爪哇使臣還其國先是爪哇東番王勿陀勞網

結遣使蘇阿那西番王勿勞波務遣阿烈占壁等俱奉  
表貢方物以其失辭留之至是遣之十月賜占城國王  
阿答阿者大統曆銷金文綺紗羅衣服等物暹羅斛國  
來貢是年僧宗泐等使西域別錄行至塞外遇一老僧泐遂拜曰明天子命往西  
天覓經去此幾何曰頭自行不到母往祇自勞耳爲我致書天子慎毋發也泐受之歸見其道所以  
乃卽位時水陸齋手書表文也  
也無墨如故  
上異之乃止先是李文忠言洮州衛餽  
運艱難非便上勅諭曰洮州西控番戎東蔽湟隴自  
來要地若棄之不守數年後必復爲患糧餉粗有苜蓿  
并所獲牛羊分給將士可支二年阿卜商之遁必走黑  
章咱之地就彼索之可得瘦瘠子不問匿于何所必擒



送而後已至是皆俘至京斬之

十三年正月 勅文忠等曰大白見東方順行西征大利宜順天時追擊番寇尋召文忠還二月故元國公脫火赤等屯和林將爲邊患命沐英討之英師至靈州遣侯騎偵知脫火赤等兵次亦集乃路率師渡黃河經寧夏歷賀蘭山涉流沙凡七日夜至其境去穹廬五十里分軍四道銜枚而進合圍之擒脫火赤等盡獲其部曲以歸四月都督濮英練兵西涼襲虜故元柳城王等二十二人兵一千三百餘馬二千餘并符印來上英復請督兵略地開答梅里之路以通商旅賜璽書聽便宜行

戒以慎謀毋忽番酋紅隄塔族酋長亦上藏卜等來朝  
別酋占藏獻馬三十匹暹羅斛國貢方物六月濮英兵  
至西石峪獲故元肖哥失里妻 部下阿哈撒等八  
十餘人占城使還賜文綺鈔帛璽書諭曰今年九月十  
八日爾國使至爲朕上壽萬里遠道非王意誠豈能應  
期若此然覽表辭乃知復與安南交兵水戰勿利朕嘗  
戒爾兩國毋深構仇讐以安生民今一勝一負終無休  
息果何爲哉十月丁丑瓜哇國王八達那巴那遣其臣  
阿烈彞烈時奉金葉表入貢使還詔諭曰爾僻居海島  
頃嘗遣使中國雖云修貢實則慕利朕皆推誠禮待前

者三佛齊國王遣使奉表來請印綬朕嘉其慕義遣使  
賜之所以懷柔遠人爾奈何設爲奸計誘使者而殺之  
豈爾恃險遠敢肆侮如是今使者來本欲拘留以其父  
母妻子之戀夷夏則一朕推此心特令歸國爾當省過  
自修毋蹈前愆干怒中國則可長守富貴其或不然自  
貽伊咎悔將無及先是西域僧板的達同其徒古麻辣  
室哩等十二人自中印度來朝命遊五臺山凡六年還  
京師居鍾山佛寺旣而板的達死古麻辣室哩等乞歸  
西域上勅禮部曰昔板的達來時觀其資貌端潔戒  
行嚴愼朕甚嘉之及居中國甚久吾中國僧俗亦重其

善行板的達死而古麻辣室哩等篤奉遺教敬如存  
可謂不背其師者矣今乞歸本國且欲以所歷中國風  
土人物論其國王使王不出戶庭坐知中國之盛其意  
良善特賜僧號曰孝淨戒師俾西還凡經歷諸國及諸  
酋長或問僧何來所歷者幾僧必具言使彼知之且彼  
來時朕嘗詢其所歷之地聞其景物多異朕亦喜焉况  
彼聞吾中國之大者乎爾禮部備錄朕諭俾僧持歸仍  
令所至諸國及諸酋長遇僧至宜善送之

十五年正月瓜哇國遣僧阿烈阿兒等奉金表貢黑奴  
男女一百一人大珠八顆胡椒七萬五千斤二月琉球

國中山王察度遣其弟泰期及其臣亞蘭匏等奉表貢  
馬二千匹硫黃二千斤賞賚并遣尚佩監奉御路謙送  
其使者歸國

十六年正月賜琉球國中山王察度鍍金銀印并織金  
文綺帛紗羅凡七十二疋山南王承察度山北王怕尼  
如之時國中三王爭雄長相攻擊使者歸言其故於是  
遣其使亞蘭匏等還國勅諭曰王能體天育民行事大  
之禮自朕卽位以來歲遣人朝貢朕嘉王至誠命尚佩  
監奉御路謙報王如禮不期王復遣使來謝今令內使  
監丞梁民同路謙齎符頒賜王印區區海中一國互爭

不已廢農傷民朕甚憫焉詩曰畏天之威于時保之王  
其罷戰息民務修爾德則國用永安并諭二王咸叩首  
從命二月諭松州衛指揮僉事耿忠曰西番之民歸附  
已久而未嘗責其貢賦聞其地多馬宜計其地之多寡  
出賦如三千戶則三十戶共出一馬四千戶則四十戶  
共之定爲土賦庶使其知尊君親上奉事朝廷之禮召  
回回珀珀至京賜以衣靴珀珀明天文之學寓居鄯縣  
有以其名聞者故召之四月 上以海外諸國進貢信  
使往來不實中國人亦有假而索賄者乃命禮部置勘  
合文簿給發俾有憑信稽考以杜奸詐但遇人貢咨文

俱於各所經布政司比對勘合相同然後發遣於是給  
來朝者凡五十九國所貢方物表式歲期回答賞賜并  
正副使廩給宴賜禮儀互市各以國大小隆殺著爲定  
式定西番貢數闢化等王每貢百人多不過百五十人  
法王貢僧徒十人凡嗣封賜誥袈裟僧帽數珠鈴杵以  
大茲恩寺刺麻僧二人充正副使長河等番僧三歲一  
貢或歲一貢貢三十人多不過五十人小者四五人至  
京餘留塞上取道黎雅洮三州

十七年五月命涼州衛指揮使宋晨等討西番叛酋兵  
至亦集乃路擒故元海道千戶也先帖木兒國公吳伯

都刺赤平章阿來等及部屬一萬八千七百餘人

二十年七月行人唐政等先使海南諸國至是還真臘  
遣使貢象五十九隻香六萬斤暹羅貢胡椒一萬斤蘇  
木十萬斤其臣坤思利濟刺試職替等獻翠羽香物餘  
十二國皆有獻

二十一年四月禮部主事高惟善自長河西原魚通寧  
遠等處還上言臣聞安邊在乎治屯守而兼恩威屯守  
既堅雖遠而有功恩威未備雖近而無益今魚通九枝  
疆土及巖州雜道二長官司東鄰柵門黎雅西接長河  
西原自唐時吐蕃強盛寧遠安靖巖州等處漢民往往



爲彼驅入九枝魚通防守漢邊元初設二萬戶府仍於  
盤陀仁陽置立寨柵邊民戍守其後各枝率衆攻仁陽  
等柵及川蜀兵起乘勢侵凌黎雅昂嘉等州洪武十年  
始隨硯門土酋歸附設巖州雜道二長官司迨今十有  
餘年官民仍舊不相統攝蓋無統制之司恣其猖獗因  
襲弊套故也近而已附者如此遠而未附者何由服之  
且巖州寧遠等處乃古之州治苟撥兵戍守就築城堡  
開墾山田使近者化而先附遠者畏威而來歸西域無  
事則供徭役有事則使之先驅撫之既久皆爲我用如  
臣之說其便有六通烏思藏朶甘鎮撫長河西可拓地

四百餘里得蕃民二千餘戶非惟黎雅之保障蜀亦永無西顧之憂一也蕃民所處老思圖之地土瘠人繁專務貿販門戶茶蜀之所有博易羌貨以贍其生若於巖州立市則此輩衣食皆仰給於我焉敢爲非二也餘特角招揀易馬收稅四事甚具從之詔更四川天全六番招討司爲武職令戍守邊界控制西番仍命景川侯曹震閱其上馬部伍之數蜀王椿奏西番蠻人作亂燒里崖關遣都指揮瞿能等從涼國公藍玉討之二十三年玉擊破西番獻捷并奏蠻人攻圍大渡千戶所亦討平之梟土官副使觀著俘其男女數千人

二十四年九月遣主事寬徹御史唐政使西域賜書諭  
別失八里王黑的兒火者曰朕觀天下有國者莫知其  
幾雖限山隔海風俗殊異然好惡之情血氣之類未嘗  
異也皇天一視同仁使巨細諸物殊方異類之民咸躋  
仁壽有土者無論遠近小大順天事大以保國安民皇  
天鑒之亦克昌焉朕膺天命以主黔黎凡亂雄擅聲教  
違朕命者兵偃之順命者撫存之是以華夏奠安惟元  
臣蠻子哈刺章等尚帥殘兵干近塞生釁遣兵征討勢  
不容已兵至捕魚兒海故元諸王駙馬及部屬悉來降  
附其間有稱自撒馬罕等處來貿易者凡數百人遣使

送歸本國今又三年矣使者歸爾別失八里王遣使來  
貢朕甚嘉焉王其益堅事大之誠通好往來命使不絕  
豈不保國于攸久乎特遣使嘉勞其悉朕意

二十五年四月藍玉率蘭州諸衛將士追逃寇祁者孫  
遂征西番罕東之地五月玉欲縱兵深入將佐多言西  
虜負固已久卒聞大軍必鳥獸散去我衆雖多無所施  
莫若緩之遣將招諭宣上威德令彼以馬來獻因撫  
其部落全師而歸玉不從遣都督宋晟等率兵徇阿真  
川土酋哈智等懼遁去又襲逃寇祈者孫弗及旣而有  
詔命玉討建昌叛酋月魯帖木兒玉又欲深入番地取

道松疊以達建昌會霖雨積旬河水泛急王悉驅將士渡河麾下知非上意多相率道亡王不得已乃由隴右抵建昌五月尚膳太監聶遷等至河州市馬召必里諸番族以勅諭之諸族皆感恩爭出馬以獻於是得馬萬三百四十餘匹以茶二十餘萬斤給之諸酋大悅遷遣使入奏命以馬分給河南山西陝西衛所騎士二十六年二月遣使往西涼緣邊諸番頒給金銅信符勅諭各族部落曰往者朝廷或有所需於爾必以茶貨酬之未嘗暴有徵也近聞邊將無狀多假朝命擾害爾等使不獲寧居今特製金銅信符族頒一符遇有使者

徵發比對相合始許承命否者械至京師罪之西寧  
僧三刺貢馬先是三刺爲書招降罕東諸部又剏佛剎  
於碾白南川以居其衆至是始來朝因請護持及寺額  
上賜名曰瞿曇寺勅曰自有佛以來見佛者無不瞻仰  
雖兇戾頑劣者亦爲之敬信化惡爲善佛之願力有如  
是耶今番僧三刺生居西土踵佛之道廣結人緣輯金  
帛以剏佛剎比者來朝京師朕嘉其向善慕義之誠特  
賜勅護持諸人不許擾害聽其自在修行違者罪之仍  
分立僧綱司以其主僧爲都綱

二十七年九月撤馬兒罕駙馬帖木兒遣酋長迭力必

失等奉表來朝貢馬二百匹表曰恭惟 大明皇帝膺

運爲兆億主光明廣大昭若天鏡無有遠近咸照臨之

臣僻在萬里外恭聞 聖德超越萬古自古所無之福

皇帝皆有之所未服之國皆服之遠方絕域昏暗之地

皆清明之今又特命施恩遠國凡商賈之人來中國者

使觀覽都邑城池富貴雄壯如出幽隱之中忽觀天日

站驛相通道路無壅欽仰聖心如照世之杯使臣心中

豁然國中部落惟知歡舞感戴臣無以報德惟仰天祝

頌 聖壽福祿如天地遠大永永無極照世杯者其國

舊傳有杯光明洞徹照之可知世事

二十八年十二月遣內使趙瑋宋福等使暹羅斛國祭  
其故王賜嗣王蘇門那綺幣勅諭曰朕卽位以來命使  
出疆周于四維歷邦國足履其境者三十六聲聞于耳  
者二十一風殊俗異大國十有八小國百四十九較之  
于今暹爲最近邇者使至知爾先王已逝嗣位有人臣  
民歡懌特遣人加禮勅至承受用光前烈

二十九年二月陝西行都指揮僉事張豫言今邇西所  
統邊衛人地錯雜供給儲糧惟籍內地轉運况各衛軍  
士多由罪謫既有壯丁代役而老幼尚同在營蠶食如  
將此輩聽于黃河以南直抵陝西以北地曠州縣寄籍



屯種每歲供給正軍俟三年後與土著軍戶一體輸租  
應役若軍戶有缺就于幼丁內選壯者補役爲便又言  
各衛軍士年七十以上并老疾無可代者若畱在伍虛  
費糧賞宜令回鄉依親其因罪戍守者則令罷役在營  
自給所缺之伍別處調補 上並從其言惟老病無親  
依者令送至京養贍

三十年禮部奏諸番國使臣客旅不通 上曰洪武初  
海外諸番與中國往來使臣不絕商賈便之近者安南  
占城真臘暹羅瓜哇大琉球三佛齊渤尼彭亨百花蘇  
門答刺西洋邦塔刺等凡三十國以胡惟庸謀亂三佛

齊乃生間諜給我使臣至彼哇國王聞知其事戒飭三  
佛齊禮送還朝是後使臣商旅阻絕諸國王之意遂爾  
不通惟安南占城真臘暹羅大琉球自入貢以來至今  
益虔大琉球王與其宰臣皆遣子弟入我中國受學

另爲

舍倍廩給冬夏衣旣  
歸卽爲其國丞相

凡諸番國使臣來者皆以禮待不

薄但未知諸國之心若何今欲遣使諭爪哇國恐三佛  
齊中途阻之聞三佛齊係爪哇統屬爾禮部備述朕意  
移文暹羅國王令遣人轉達爪哇知之於是禮部咨暹  
羅王曰自有天地以來卽有君臣上下之分且有中國  
四夷之禮從古皆然我朝混一之初海外諸番莫不來

庭豈意胡惟庸造逆通三佛齊乃生間諜給我信使肆  
行巧詐彼豈不知大琉球王與其宰臣皆遣子弟入中  
國受學 皇上賜寒暑之衣有疾則命醫診之 皇上  
之心仁義兼盡 皇上一以仁義待諸番國何三佛齊  
諸國背大恩失君臣之禮據有一撮之土欲與中國抗  
衡倘 皇上震怒使一偏將將十萬衆越海問罪如覆  
手耳何不思之甚乎 皇上嘗曰安南占城真臘暹羅  
大琉球皆修臣職惟三佛齊梗我聲教夫智者憂未然  
勇者能從義彼三佛齊以蕞爾之國而持奸于國中可  
謂不畏禍者爾暹羅國王猶守臣節 皇上所知可轉

達瓜哇俾其以大義告于三佛齊原係統屬其言必信  
或能改過從善則與諸國咸禮遇之如初勿自疑也初  
徹寬爲黑的兒火者拘畱副使二人得還復遣使諭曰  
朕卽位以來四方諸國商人入我中華互市遂上未嘗  
阻絕朕復勅吾吏民不得恃強欺謾番商皆獲厚利向  
者撒麻兒罕商人有在漠北者吾大將北征執歸朕命  
居中國互市後知其故俱遣還本國其君長感恩入貢  
因遣寬徹等出使通好撫以恩信爾反拘吾使者豈禮  
也哉近年回回入邊者畱之待寬徹歸然後遣還及回  
回稱有父母妻子朕憐其至情不待徹歸卽與放回是

用再遣使賫書往諭使知朝廷恩意毋使道路閉塞自  
啟兵端 勅都督府曰古帝王必嚴夷夏之辨蓋戎狄  
貪而無厭苟不制之必生邊患今朶甘烏思藏長河一  
帶番戎自昔以馬入中國易茶所謂貿遷有無者也邇  
因私茶出境馬入互市者少彼馬日貴中國之茶日賤  
而彼玩侮之心漸生卽移文蜀府長史啟王發都司官  
軍于松潘碉門黎雅河州臨洮及西番開口巡察朕豈  
爲利哉制馭夷狄不得不然也遣駙馬都尉謝達諭蜀  
王椿曰秦蜀之茶自邊出番五千餘里彼不可一日無  
夫物有至薄而用之則重者茶是也始於唐盛于宋前

代非以此專利益利戎狄之道當其所有而貴之  
無我國家推茶本資易馬以備邊用今惟易簪纓雜物  
使番夷坐收其利而馬入乎國者少何以坐制遠夷巡  
察不嚴邊吏之罪無得輕恕 兵部曰巴茶易馬入  
有定禁奸人私販且假朝廷爲名橫科馬匹以致番人  
悖信故遣曹國公李景隆賞金牌勘合以傳朕命令各  
番領牌爲符契以絕奸欺尚恐邊衛將士巡訪不嚴致  
有私漏不可不懲于是兵部具禁約事宜諭川陝守邊  
衛所仍遣僧官着藏卜等徃番中諭之私販既盛皆倚  
勢橫暴所在不勝其擾雖藩閫大吏皆畏威奉順時四

月農事方急駙馬都尉歐陽倫適有事陝西令布政使司移所屬起車數十輛載茶往河州倫家人周保尤縱暴驅迫有司至蘭縣河橋巡檢司捶辱其吏吏不能堪以其事聞上大怒以布政官不言并倫賜死保等皆坐誅茶貨沒入以河橋吏不避權貴遣使賁勅嘉勞之尋李景隆還自西番用茶五十萬斤得馬一萬三千五百餘匹分給京衛騎士上諭兵部臣曰古人問君國之富數馬以對今統一寰宇欲安中國制四夷豈可不重馬哉守邊諸將初皆精勇久定之後人各怠慢但務理財罔知備禦如甘肅西涼守將宋晟莊德張文傑等

嘗征討邊夷多獲馬疋牧於塞上又以所虜胡人爲家  
奴待如親屬諸將曾不思凡征討所得資畜皆出軍士  
之力一旦家奴發生齧群牧而掠去損國威墮軍實禍  
且不測夫邊將初意不過借此理財究其流弊或至亡  
財此果智者所爲乎爾兵部其以此事諭知自今各邊  
守將不得以胡人爲奴所畜馬或千百疋或四五十疋  
不得私鬻若欲財用則入馬于官官給其直俟朝廷出  
師征討悉以所畜馬分給騎士師還之日損者償其直  
馬少不願鬻者聽此外惟驛傳及太僕寺馬戶得買餘  
皆不許



三十一年三月 上謂禮臣曰今天下一統四夷諸番皆以時朝貢至如烏思藏西天八剌國去中國極遠亦三年一朝惟打煎爐長河西土酋外附月魯帖 兒賈哈刺不臣中國發兵討之固不爲難然鋒刃之下死者必衆宜遣人諭其酋長若聽命來朝一以恩待不悛則發兵三十萬聲罪致討于是禮部檄打煎爐長河西酋長曰人無貴賤無夷夏凡有血氣莫不畏死好生畏禍好福然與其畏之孰若避之與其好之孰若求之我皇上受天明命東征西伐不勞餘力四海豪傑頽首歸心已三十年至如遠者莫若烏思藏西天尼八剌國亦

三年一朝不敢後時其故何哉正以君臣之分不可不  
謹事上之心不可不誠征伐之師不可不懼也是以朝  
覲之日錫之以金帛勞之以宴禮比其還國則一國之  
人同榮之今邇打煎爐長河西土酋染月魯帖木兒賈  
哈刺之污不朝久矣豈避禍求福之道耶夫堂堂天朝  
視爾土酋大海一粟伐之取之盡戮其人猶如燎毛然  
而姑容不爾較者天地好生之心也今遣使諭爾酋長  
其思君臣大義以時來朝則福汝生汝獲利爲無窮其  
或不悛大將將三十萬人爾境問爾罪爾其審哉于是  
悉來朝貢